

U pas ti koloto menai turu katunura i HIBRU

*E Sunahan e hala sila nama u raranga i tanen
tara Pien Tson i tanen*

¹ I manasa e Sunahan e rangaia turu tuburara tara mamana mar maroro tara pöata a parpara, me hala sila nenama u raranga i tanen turu propet. ² Kaba tara sukusukuna kapakapana pöata nonei e ranga silama i tarara tara Pien Tson i tanen. E Sunahan e habutu sila naia a mamana tara Pien Tson i tanen, na nonei e hopö kap sileien tego lu menaien a mamana hoboto. ³ A Pien Tson i tanen nonei u namnamei turu ualesala tere Sunahan. Nonei e here korue nei e Sunahan, na mamana hoboto e ka haniga silana turu raranga u tagala i tanen. I murina te galus ba naien a man markato a man omi turu katuun, ba nonei ena gumna tara pal matou tere Sunahan iasa koru i Kolö.

*A Pien Tson tere Sunahan e pan bala koru rena u
angelo*

⁴ A pien Tson tere Sunahan e pan koruna, na e pan koru bala rena u angelo. Ne Sunahan e hale meien a solo te pan bala koru nena a man solo turu angelo. ⁵ E Sunahan ena mala mar ranga uai teka ta töa ta angelo i tanen bate poeiena:
“Alö a pien Tson i tar.

I romana alö e hatamana mia i tar.”

Kaba nonei e mar ranga uu teka tara Pien Tson i tanen. Kaba nonei ema mala mar ranga uai teka ta töa ta angelo bate poeiena,

“Alia e hapien nagouen,

na nonei e hatamana noua i tar.”

E möa. Kaba nonei e mar ranga uu teka tara Pien Tson i tanen. ⁶ A Pien Tson tere Sunahan e pan saluhena tara mamana hoboto, na pöata te katsin hala mena meien e Sunahan i puta, be Sunahan e poeiena,

“U angelo hoboto i tar egi hatsunono uu i tanen.”

⁷ U Buku u Göagono e mar ranga meranei u angelo teka:

“E Sunahan e kato here rai u angelo i tanen a lomolomo.

Na u katunun kui i tanen e kato here raneien u tula u hiski.”

⁸ Na u Buku u Göagono e mar ranga menai a Pien Tson tere Sunahan teka:

“O Sunahan, a solon king i tamölö e ka nitöana romana.

Alö e tsunono hamatskö rem u katuun tara nipepeito i tamölö.

⁹ Alö e haniga korueiem a markato a matskö batema hanige mi a markato tema matskö nei.

Na e Sunahan noahas i tamölö te haka sei ia lö turu katuun hoboto i tamölö,

na niasaala i tamölö e pan bala nena a niasaala i taren.”

¹⁰ Na u Buku u Göagono e mar ranga has uana teka,

“O Tsunono, alö u katoe a han i puta tara tantani-ana pöata.

Na lima mölö noahas tu katoe ii lö a han i kolö.

- 11 Nori ena taia hoboto riou romana, kaba lö e ka nitöa mou.
 Nori ena omi here roi u hasobö u toutounei.
- 12 Alö ena mar pits mera moien temar pits menari u hasobö.
 Alö ena palis mera moien temar palis menari u hasobö.
 Kaba lö e marka nitöa las uamou teka batema antunan palismi.
 Na pöata i tamölö ema antunan kapa noi.”
- 13 E Sunahan ena mala mar ranga uai teka ta töa ta angelo bate poeiena,
 “Alö go gum ia teka tara pal matou i tar balia te hale goilö u katuun te paköe riou lö balö tena pitaputa ramouen.”
- Kaba nonei e mar ranga uu teka tara Pien Tson i tanen. 14 U angelo u saha u mar katuun? Nori hoboto a man namnamei te kui beier e Sunahan. Nonei e hala sil rameien tegi taguhu meraien u katuun te katsin lu pouts rena e Sunahan.

2

A markato a niga koru tere Sunahan te lu pouts meraien ra

1 Nonei tegi pile hakarapoto beira u raranga u mana ti hengoen ra. Ara ena mots hapolasa susul ba naren. 2 A Lo tere Mosis te hala sila nama e Sunahan turu angelo e manana, na u katuun ti hipus naien batema kukutie rien i lu hasi u nihahuna te antunaia tara markato a omi ti katoeien. 3 Kaba u raranga tere Iesu e pan bala nena u raranga turu angelo, na ra e möa koru tegi bus ba menai a nihahuna te totone rara a markato a niga koru teka, te lu pouts mera neira

e Sunahan. A Tsunono e Iesu noahas te habulun-gana mamin a maroro teka te lu pouts mera nei e Sunahan u katuun, na u katuun ti hengoeien i haröto raira u raranga teka e manana. ⁴ Na e Sunahan e haröto hasiin te mana uana u raranga teka te kato menaien u mamana u hiharöto na u mirakol u parpara bate hala nena a man tötöa man nitagala turu Namnamei u Göagono e antunana turu ngilngil peisa i tanen.

E Iesu nonei a katuun te lupouts raioura

⁵ Alam e ranga nem a hanina i puta tara pöata i murimuri, e Sunahan ema haka mena neien turu angelo. E möa. ⁶ Tara töa makum iahana u Buku u Göagono e poeiena:

“O Sunahan, u katuun u ha nori koru ba lö te hakats ramen bate tara kap ramen?

Nori a manka pinopino koru lasi.

⁷ Alö u haka puta raien turu angelo tara tsitabubun pöata,
ba lö te töan haka sei ramen bate hala ramien a solo pan.

⁸ Alö u haka puteia a mamana hoboto i taren.”

Tara pöata e Sunahan e haka puteia a manka hoboto turu katuun, e möa ta ka tega ka halhal. Kaba ara ema tara noe rei te pan saluhe mena neien a mamana. ⁹ Kaba ara e tarera e Iesu i hale ii a solo pan, taraha nonei e lui a kamits pan me matena. E Sunahan e taatagi koru raioura me gamon haka pute na e Iesu turu angelo tego mate sil meraien u katuun hoboto. ¹⁰ E Sunahan e habutu bei a manka hoboto a peisanen. Na e

nigana te lu menai e Iesu a kamits, taraha e Sunahan e kato taatago sileien a tsonun mammam bate hapien rena u katuun u parpara bate ngö mera neien i Kolö.

¹¹ E Iesu e kato ranei ra u katuun u matskö tere Sunahan, na ra e ka mera a töa puku a Tamarara. Nonei tena matsingolo benei e Iesu te ngö mera neien ra u toulanen na u hahinanen. ¹² Be Iesu e poeiena,

“O Sunahan, alia e hatei nagoua solo mölö turu toular na u hahinar.

Alia e köma gou bate soloseie gou a solo mölö i matar u katuun i tamölö tara pöata te lotu hobotorien.”

¹³ Ba nonei e ranga lenina me poeiena,

“Alia e hamana goua tere Sunahan.”

Me ranga lel noahasina me poeiena,

“Alia e kagu, na galapien has te hala ramei lia e Sunahan.”

¹⁴ A galapien teka te ranga nanen nori u katuun tuun, na e Iesu e butun katuun here has rameien. Nonei e kato sile ii a ka teka tego tatei mate uaien bate töan kato homiena e Satan, nonei a katuun te kamena a nitagala tega kato hamate meraien u katuun. ¹⁵ U katuun hoboto i solon matouti a tou mate bate ka here rari u karabus tara nimatout teka. Be Iesu e mate silena tego luba meraien a nimatout. ¹⁶ Ara e atei silera nonei ema la sile mei tegomi taguhu merai u angelo. E möa. Nonei e la silema tegomi taguhu merai a pala tere Abraham. ¹⁷ Na e matsköna te butu here meraien u toulanen tara mamana markato bate töan luena a toukui tara tsunono pan turu pris te taatagi rena u katuun bate roron kui haniga beiena e Sunahan. Nonei e kato sile ii a ka teka tega luba menaien

a man markato a man omi turu katuun bate tara pouts bera neien e Sunahan. ¹⁸ E Iesu e antunan taguhu rena u katuun te torohana raier, taraha nonei e ka has mei a man torohana i oulnen peisa me söata meneien u kamits.

3

E Iesu e pan nena e Mosis

¹ A matsi hahatoulana, e Sunahan e ngö sil railimiou tego katuun uaiam limiou i tanen. Na limiou go hakats naiam e Iesu. E Sunahan e hala sile mei e Iesu tegomi aposol uen turu lotu i tarara na tegomi tsunono pan meraien u pris turu lotu i tarara. ² E Iesu e kukute hanigei e Sunahan te hopö kap naien tara toukui teka, te markato haniga has menai e Mosis a toukui i tanen i gusuna u katuun tere Sunahan. ³ A katuun te habuti a hun haposa a solonen e pan bala nena u katuun i tanen. Na e markato has uana iesana, e Iesu e ka mena a solo te pan bala nena a solo tere Mosis. ⁴ A mamana hun haposa e ka mena a katuun te habuteien, kaba e Sunahan te habuti a mamanaka hoboto. ⁵ E Mosis, a katunun kui tere Sunahan, e katoe a toukui a niga i gusuna u katuun hoboto tere Sunahan, bate hatei nena a manka tega rangein e Sunahan i murimuri. ⁶ Kaba e Kristo, a Pien Tson tere Sunahan, e tara kap haniga rena u katuun tere Sunahan. Na tegi hamana haniga uu ra i tanen bate hamana silera a manka man niga i tanen, ara u katuun hamana i tanen.

U katuun tere Sunahan e tatei husar

⁷⁻⁸ U Namnamei u Göagono e poeiena:

“Te hengoe mia limiou u raranga tere Sunahan i romana,
 ba limiou tema tatei mar hipus len uami ti
 mar hipus uu tubumilimiou

bate tori tsuga nariou lia

batena torohane ria lia tara makum a palaka.

⁹ Aa, u tubumilimiou i tarei a man toukui pan i tar
 turu tohats u maloto u hiningal,

kaba nori i torohana noa haseiou lia.

¹⁰ Ba nori u katuun teka e kato haraharaha korue
 riou lia,

ba lia e poeiegu, ‘Nori e roron tori hasoalar.

Ba nori tema kukutieri a maroro i tar.’

¹¹ Na lia u raharaha koru me ranga hamana gia
 iasa me poeiegu,

‘Nori ema antunan la koru uari tara hanin
 husa i tar.’ ”

¹² A matsi hahatoulana, haneiam. Mōa tu ka
 meiam u tori u omi te hahamanana bate laba
 namiou e Sunahan te tōatōa nitōana. ¹³ Alimiou
 go hihitaguhi iam turu mamana u lan antunana
 te ka noa uana a pōata. Taraha, a markato a omi
 ena mots gamo ranou limiou bate kato hahhipus
 ranou limiou. ¹⁴ Tegi hamana hatagala nitōa uu ra
 tere Sunahan ti mar hamana mam uu ra, ara e ka
 uara tere Kristo.

¹⁵ Na lia e hatei hahuol rahi limiou a ka te ranga
 nena u Buku u Göagono:

“I romana, te hengoe moua limiou u raranga tere
 Sunahan,

alimiou ema tatei mar hipus len uamoi timar
 hipus uu tubumilimiou

bate tori tsuga nariou lia.”

¹⁶ Eresi nori u katuun ti hengo u raranga tere
 Sunahan bate tori tsuga naren? U katuun te peigi

rema e Mosis tara han i Itsip. ¹⁷ Na eresi u katuun ti raharahi e Sunahan turu tohats u maloto u hiningal? Nonei e raharاهر u katuun ti kato homi bate mater, bate laba rarien tara makum a palaka. ¹⁸ E Sunahan e rangein eresi tara pöata te ranga hamana uaien iasa bate poeiena, “Nori ema antunan la koru uari tara hanin husa i tar”? Nonei e rangein u katuun ti hipus naien. ¹⁹ Na ra e atei sil talera nori ima la mei tara hanin husa i tanen, taraha nori i hahamanein e Sunahan.

4

¹ U raranga te hopö kapiin e Sunahan te la uama i tarara e poeiena, ara ena tatei husaria i tanen. Kaba ragi hanei sil ta töa i tarara ena mots na la uanei nonei tara makumun hahusa teka. ² U Bulungana u Niga e la uama i tarara, temar la has uamen turu katuun teka i manasa. Nori i hengoe u bulungana, kaba u raranga teka ema taguhu raien, taraha nori i hengo papala tuneien bate hahamanar. ³ Kaba ra te kamera u nihamana tere Sunahan na ra e tatei la uara tara makumun husa i tanen. Nonei e pei,

“Alia u raharaha koru me ranga hamana gia iasa me poeiegu,

‘Alimiou u katuun te hahamana miou ema antunan la koru uamoi tara hanin husa i tar!’ ”

E Sunahan e mar ranga uu teka, noahasina te kapa uu a toukui i tanen tara pöata te kui hakape ien a han i puta, nonei e solon husa noa. ⁴ A töa makum turu Buku u Göagono e hatei nena u hatohitina u lan bate poeiena, “E Sunahan e kato hakapi a man toukui hoboto i tanen ba turu hatohitina u lan banonei e husana.” ⁵ Kaba nonei a makumun

raranga teka e ranga lel pon nena, “Nori ema antunan la koru uari tara hanin husa i tar.” ⁶ U katuun ti hengo mami u Bulungana u Niga ima la ii tara hanin husa tere Sunahan, taraha nori i hahamana. Kaba e Sunahan e haniga nena tegi la uu a palair u katuun tara hanin husa i tanen. ⁷ Kaba i murina a pöata tara hun katuun teka, turu lahisa u hiningal te la hakapa, be Sunahan e habulungana sila nenama u raranga teka i runguna e Devit timar ranga mam uu,

“I romana, te hengoe moa limiou u raranga i tar, alia e Sunahan, ba limiou tema tatei hipus mi.”

⁸ Sanena e Josua te hala raien ta makumun husa, e Sunahan sanena ema ranga hamurimuri lel nai tu taina tu lanin husa len. ⁹ Na ra e ateira u katuun tere Sunahan e kanoa has meriou a makumun husa, bate here nei a pöatan husa tere Sunahan turu hatohitina u lan. ¹⁰ A katuun te husa gono mena e Sunahan e husa mena e kato hakapi a toukui i tanen, te markato has uu e Sunahan e husa mei a pöata te kato hakapeien a toukui i tanen. ¹¹ Te markato uanen teka bara te torohana hatagala silera tegi la uu ra tara makumun husa tere Sunahan. Ta töa i tarara ena mots kukutena ti markato uen i manasa batena rusuna bate taiana.

¹² U raranga tere Sunahan a nitöatöa, na e kana na e kui hatagala nitöana. E here nei u kilata u nou koru, kaba e nou bala nena u kilata te nou hihapalana. Na u raranga i tanen e antunan hamoueiena u namnamei tara katuun. Nonei e tasuna i torina a katuun iogana nitöa, bate oneiena u hakhakats na u ngilngil i tanen. ¹³ E möa ta töa ta ka tegi antunan hamous banai e Sunahan,

taraha nonei e tarena a mamananaka na mamananaka hoboto e kana ielesala. E Sunahan puku noahas te antunan oneiena a mamana markato i tarara.

E Iesu a pris a tsunono pan

¹⁴ Aragi pile hakarapotein a ka te hamane rara. Taraha, ara e ka mera a pris a tsunono pan te la nitöa uu tara makum te kana e Sunahan. Nonei e Iesu, a Pien Tson tere Sunahan. ¹⁵ Kaba ra egima tatei hakats ii bate poeiera a pris a tsunono pan i tarara ema antunan taatagi ranei ra tara pöata tema tagala ria ra. E möa. Kaba man torohana te ron butuna i tarara, e butu hasia i tanen tego torohana menaien. Kaba nonei ema kato homi ii. ¹⁶ Na aragi ongolo tala bate la hasukusuku uara tara makum a göagono tere Sunahan tara pöata te singo ria ra, taraha nonei e taatagi ranoura ra. Na saha pöata tema tagala reia ra, nonei e taatagi ranou ra bate taguhu ranou ra.

5

¹ U Jiu e markato uaier teka: nori e hopö kap ner a tsunono pan turu pris i taren bate hale rien a toukui tego kui be menaien e Sunahan bate taguhu ranen. A tsunono pan turu pris e hala mena nei a man kaan halhala puku na mamana mar kaan haats tere Sunahan tego luba menaien a man markato a man omi turu katuun. ² Nonei a pris teka ema tagala kap nanei a man markato a man omi, taraha nonei a katuun tuun, ba nonei te tuatami na turu katuun ti moa ta niätei na tema kukutieri a maroro tere Sunahan. ³ Nonei ega haats sil a man markato a man omi turu katuun na man markato a man omi has i tanen, taraha nonei ema tagala has nei. ⁴ A katuun ema lu

menei a nitsunono teka u ngil peisa i tanen. E möa. E Sunahan peisa te ngö sile nei a katuun a toukui teka, temar ngö has menaien e Eron a pris i manasa.

⁵ Na e kato has uana iesana tere Kristo. Nonei ema hala sei ii a peisanen tega tsunono pan uaien. E möa. E Sunahan noahas te katoe ii e Kristo a tsunono pan turu pris. Nonei e Sunahan te ranga mei e Kristo me poeiena,

“Alö a Pien Tson i tar.

I romana alö e hatamana mia i tar.”

⁶ Na nonei e pei hasi tara tana makum turu Buku u Göagono,

“Alö e pris nitöa mou tara mamana pöata te markato has uu e Melkisedek a pris.”

⁷ Tara pöata te kaia e Iesu i puta, nonei e singo hatagala koru u tere Sunahan bate ngala hapan koru mena te singo sil menaneien ta hitaguhu, taraha e Sunahan e antunan hatongo kap nanen tara tou mate. Na e Sunahan e hengo haseien, taraha nonei e hengo koru hasi e Sunahan. ⁸ E manana, nonei a Pien tere Sunahan, kaba nonei e sagoho nohasi u kamits, na ka teka e hatutseien a markato te hengo haniga menaien e Sunahan.

⁹ Be Sunahan e katoe neien a pris te niga saluhe koru. Ba nonei te taguhu rena u katuun hoboto ti hengoeien bate hala raneien a nitöatöa te ka nitöana. ¹⁰ E Sunahan e katoe ii e Iesu a Pris a kapan saluhe te markato has uu e Melkisedek a pris.

Ara gima hapolasa bana ii e Sunahan

¹¹ U raranga u parpara tara ka teka e kanoana, kaba alam e lagi hahatarare namen i tamilimiou,

taraha alimiou e lagi atei koru miou. ¹² Alam u solon hatuts raiou limiou antunana alimiou go hihatuts hamanasa iam. Kaba e möa. Alimiou e ngil noa hasemiou a tana katuun tega hatuts lel railimiou a man markato turu raranga tere Sunahan ti hatuts tutuun railimiou. Alimiou e here pouts lel rami u göama te sus noar, tema antunan noueri a kannou a kihil. ¹³ U katuun temar kato uar teka ema tatei tara hanigeri a ka te nigana na ka te omina. ¹⁴ Kaba u hihatuts pan e ka uana turu katuun ti solon atei sil a markato a matskö, bate tatei hamoueier a ka te nigana na ka te omina.

6

¹⁻² Aragi hatakui talei a man hihatuts pan bate hapolasera* a markato te taatate tuun menari a man hihatuts tutuun tere Kristo. Ara i solon atei sil hakapi a man hihatuts tutuun teka, hena: Aragi habirits ban a markatona i tarara i manasa tema la gono menei a nitöatöa tere Sunahan, na aragi hamana uu tere Sunahan, na aragi kukute u hihatutsina te lu menari a baptais na te hatakopo menari ualima tara katuun, na ragi kukute u hihatutsina te takei pouts uaria tara tou mate na u hihatutsina te lu menari a nihahuna te ka nitöana. Kaba, ra gima tatei kaan töa mei a man raranga tutunina i manasa. E möa. ³ Tega haniga naia e Sunahan a ka teka bara te luera u hihatuts u kapan.

⁴ E möa koru tegi antunan palis lel menai u katuun u hakhakats i taren ti hapolasa ba

* **6:1-2:** A kristen te ngilin tagalana tara nihamana i tanen ega kukute a man hihatuts pan tere Iesu.

menaien e Sunahan. Nori i ka mamia turu ualesala tere Sunahan. Na nori i atei ia i peisaren, a ka a nigana i Kolö, na nori i ka hasia turu Namnamei u Göagono. ⁵ Nori i atei sil te niga uana u raranga tere Sunahan, na nori i atei sil hasi a man nitagala tara pöata i murimuri. ⁶ Kaba nori i hapolasa ba noa hasiin e Sunahan. Na e möa koru tegi antunan palis lel menaien u hakhakats i taren, taraha e here nei nori e nila lel naria a Pien tere Sunahan tara kuruse, bate hamatsingolo lele rien i matar u katuun.

⁷ E Sunahan e kalaleiena a kui te ue iena a langits te polona i tanen, taraha a kui teka e habutena a kannou a niga te taguhena a katuun terena kui. ⁸ Kaba a kui te habutena a manka a man hihitoka na kolits a omi ema niga nei. E Sunahan e hamal nanouen ba tena hakulupu ba naria turu tula. Na e markato has uana iesana turu katuun u omi.

⁹ Alam e mar ranga uaiem teka, kaba lam e hamanem a markato i tamilimiou e niga bala nena a markato a omi teka, taraha e Sunahan e lu pouts raiou limiou. ¹⁰ E Sunahan ema solopale nei a toukui i tamilimiou na niniganiga na u ngilngil ti taguhu merai limiou u katuun i tanen te la noahasina i romana. ¹¹ Na lam e ngilem alimiou a man tötäa ego markato haniga noahas uaiam teka, antunana te butu hamana noa romana a manka te hamana silemi limiou. ¹² Alimiou goma here rami u katuun u karous. Alimiou go kukute raiam u katuun, tara nihamana i taren na te hahaloso haniga uaren, nori ena lueriou a mamanaka te ranga hamanein a Tsunono.

U raranga u tagala te hopö kapiin e Sunahan

¹³ Pöata te hala naia e Sunahan u rangan hamana tere Abraham, nonei e ranga hamanaia i peisanen pouts, taraha e möa ta taina ta katuun tega pania i tanen. ¹⁴ Ba nonei e poeiena, “U mana koru, alia e kalale gou lö balö te hatuhane mou a pien ba lia te katoe goi lö e tubur u katuun u parpara koru.” ¹⁵ E Abraham e hahaloso haniga nitöa, ba nonei e lueiena a ka te ranga hamanein e Sunahan.

¹⁶ Tara pöata te hamana uana a katuun iasa, nonei e poeiena a solo te pan bala nena a solo i tanen. Na u rangan hamana teka e hapiou nena u raranga turu katuun te ranga sile ren. ¹⁷ E Sunahan e ranga hamanein tego taguhu meraien ra u katuun i tanen. Nonei e ngilin haröto halesala koru raira tema antunan palis menaneien a ka te ngilin katoe nen. Na nonei e kato hasi u tana u ranga te mana uana iasa ti hatagale ii u rangan hamana mam i tanen. ¹⁸ Na u huol u rangan hamana teka ema tatei palis nei, na e Sunahan ema tatei gamo has naneien. Na ka teka e hatagala koruena a torirara, ara u katuun ti la uu tere Sunahan tego hatongo kap meraien ra, bara te pile hakarapoto nera a markato te hamana sil mena rei ra a nihitaguhu tere Sunahan. ¹⁹ A ka te hamana sile rara e hatagala sile nei a torirara tegi ka gono nitöa menai ra e Sunahan. Na ka te hamana sile rara e ka hamatsköna te kana e Sunahan. E here nei a pöata te la hapalis uana a tsunono pan turu pris i hapalana u labalaba pan te kutena bate tasuna tara makum te göagono koruna. ²⁰ Na e Iesu e tasu hakapa has ba raiou ra iahana Luman Lotu Pan i Kolö. Nonei e mam

raiou ra tara makum te ka hamatsköna e Sunahan. Na nonei a tsunono pan turu pris te markato has uu e Melkisedek a pris. E Sunahan e katoe ii e Iesu a Pris a kapan saluhe te markato has uu e Melkisedek a pris.

7

E Melkisedek a pris

¹ E Melkisedek a kingina i Salem, na nonei a pris has tere Sunahan iasa koru. Tara pöata te kopis ma e Abraham tara hiatatung te atung hamate merameien u king, be Melkisedek e hitupali gono menen be kalale nen. ² Be Abraham e lu kakatena a manka hoboto te lue men tara hiatatung tara maloto a makum me hala nena a töa makum tere Melkisedek. A solo, e Melkisedek e poeiena, A king tara markato a niga na matskö. Na e pei hasena, A king tara masalohana, taraha a solo e Salem e poeiena, masalohana. ³ E möa tu töa tu buku tega ranga hatein e Melkisedek e ka mei ta tamanen na ta tsinanen na ta tubunen, tsi tega ranga hatein nonei i posei, na tega ranga hatei hasiin nonei e mate. Nonei e here nei a Pien tson tere Sunahan. Nonei a pris na tara mamana pöata.

⁴ Ba limiou te tatei tara marei talemiou nonei a tson a kapan koru, taraha e tuburara noahas e Abraham te haleien a hamalotona makum tara manka hoboto te lue men tara hiatatung. ⁵ Alimiou e atei silemiou e Livai e hatubunaia tere Abraham. Na u pris te hatubuna ria tere Livai te kukutier u raranga tara Lo tere Mosis te poeiena nori egi roron lu a hamalotona makum tara manka turu katunura i Israel. U pris e

roron lue ria a manka teka turu toularen, noahasina te hatubuna has uaren tere Abraham. ⁶ E Melkisedek ema pala uai tere Livai. Kaba nonei e lu noa hasi a hamalotona makum tere Abraham, nonei a katuun te lui u raranga hamana tere Sunahan, na e Melkisedek e kalala hasi e Abraham. ⁷ Ara e atei silera a katuun te panina te kalalena a katuun te teteneina.

⁸ Na hamalotona makum e roron hala menari turu pris te pala uar tere Livai, tena materiou. E Melkisedek e lu hasi a hamalotona a makum kaba nonei e tōatōa nitōana, te ranga has uana u Buku u Göagono. ⁹ Ara e atei silera a pala te hatubuna ria tere Livai e lueier a hamalotona makum. Kaba pōata te hala nai a Abraham a hamalotona makum tere Melkisedek, e here hasei e Livai e hala sila nai a hamalotona makum tere Melkisedek tere Abraham. ¹⁰ E manana, e Livai e hatubunaia tere Abraham, na nonei ima posa noe ii tara pōata tere Melkisedek. Kaba ara e tatei poeiera e Livai e ka hakapaia i tuenreina e tubunen e Abraham tara pōata te hitupali gono meia e Melkisedek e Abraham.

¹¹ E Sunahan e halarai a tei Israel a Lo, na nonei e hopō kapir u pris ti pala uu tere Livai tegi tara kap menaien a Lo. Sanena a toukui turu pris ti pala uu tere Livai egi kato hanigan tōari u katuun, e Sunahan sane ma tatei hopō kap nai a markato a tsimus turu pris te kukutiena a markato tere Melkisedek a pris, batema markato uanei tara markato tere Eron a pris te pala u tere Livai. Kaba e Sunahan e hopō kap hamanein a markato a tsimus turu pris. ¹² Na te palisna a markato turu pris, ba lo turu pris te tatei palis hasina. ¹³⁻¹⁴ U

raranga teka e hatei nena a Tsunono i tarara. Ara e atei silera nonei e pala uu tere Juda na ema pala ua ii tere Livai. Na e möa ta töa ta katuun tere Juda tega kui ia tara makumun haats. Pöata te ranga naia e Mosis a toukui turu pris, nonei ema katoe ii tu töa tu raranga tara pala tere Juda. E möa.

A taina pris te markato has uana tere Melkisedek

¹⁵ Na tana pris e butu hakapa tala te markato uana tere Melkisedek. Nonei e Kristo. ¹⁶ Ara e atei silera nonei ima katoe ii a pris iahana a Lo te poeiena nonei ega hatubunaia tere Livai. E möa. E Sunahan te katoeien a pris tara nitagala tara nitöatöa i tanen tema antunan kapa nei. ¹⁷ Taraha, u Buku u Göagono e poeiena:

“Alö e pris nitöa mou tara mamana pöata te markato uu e Melkisedek.”

¹⁸ Na e Sunahan e hakapa mei a lo na i manasa, taraha nonei a lo teka ema tagala ii, e ka pinopino tuun. ¹⁹ A Lo tere Mosis ema kato hanige ii ta töa ta ka na ta katuun. Kaba a maroro a niga bala koru e butu hakapa, na ra e tatei la uara tere Sunahan te sila uara ra tara maroro teka. ²⁰ E Iesu e butun pris gono mei u raranga tere Sunahan te mana uana iasa. ²¹ A pal tson i lui a toukui tara pris i manasa be möana ta katuun tega hamana uu iasa. Kaba e Sunahan e katoe ii e Iesu a pris me ranga hamana has uana iasa me poeiena i tanen,

“Alia a Tsunono u kato hakapi u ranga te mana uana iasa. Alia ema tatei palisegi u hakats i tar.

‘Alö e pris nitöa mou tara mamana pöata.’ ”

²² U ranga teka te manana iasa, e haröto nena e Iesu e hatagalena u raranga tere Sunahan te kits gono meraien u katuun na e niga bala nena u rangana tara Lo na i manasa.

²³ U pris ra i manasa i parpara koru, taraha, pöata te mateia a töa turu pris ba tai te palise nen bate la lasina. ²⁴ Kaba e Iesu e ka nitöa nou, na toukuin pris i tanen e möa ta kapakapa nen. ²⁵ Na e Iesu e antunan lu pouts rena u katuun hoboto tara mamana pöata te la sila rima i tanen bate la uaier tere Sunahan, taraha nonei e ka nitöa silena tego singo sil meraien tere Sunahan.

²⁶ Na e niga koruna te ka menareira a pris a kapan koru te göagono koruna na tema ka töa koru menei ta ka ta omi i tanen na e möa ta ka tega kato homieien na e ka halhal barena u katuun u omi. Na nonei e söata sei korue ria tara han tere tamanen i Kolö. ²⁷ Nonei ema here ranei a palair u tsunono pan turu pris te roron haatsir turu mamana u lan bate haats mam sileier a man markato a man omi i taren bate töan haats sileier a man markato a man omi turu katuun. Kaba e Iesu e möa. Tara pöata te hala naien a peisanen tara tou mate, nonei e katoeien u töa puku lasi u haats te hakapi u haats hoboto. ²⁸ A Lo tere Mosis e hopö kap rena u katuun tuun tegi tsunono pan uaieren turu pris, kaba nori ema tagala nitöa sileri a markato a omi. Kaba u raranga u mana koru te lama i murina a pöata tara Lo, te hopö kapiin a Pien tson tere Sunahan te matskö nitöana tara toukuin pris teka te ka nitöa nou tara mamana pöata tema antunan kapa nei.

8

E Iesu a pris a tsunono pan i tarara

¹ A ka koru a kapan te ranga nemulam e markato uana teka: e Křisto nonei a pris a tsunono pan i tarara. Nonei e gumna tara pal matou tere Tamanen i Kolö. ² Nonei e kuieiena a toukuin Pris i tanen tara makum a göagono koru tara luman lotu te kui e Sunahan.

³ A mamana pris pan hoboto e kamer a toukui tegi hala menaien a man kaan halhala puku na u haats tere Sunahan. Na a pris a tsunono pan i tarara ega ka has mei ta ka tega hala naien.

⁴ Sanena nonei tega kaia i puta, nonei egoma antunan pris ii, taraha u pris i ka hakapa tegi halan a manka te matsköna tara Lo turu Jiu. ⁵ Kaba a toukui i taren e haharuei tuun nena a luman lotu hamana i Kolö. Taraha, pöata te katsin hatakeia e Mosis a luman lotu labalaba, be Sunahan e ranga menen, “Alö go tara kap hanigein tego kui hapopo naia lö a mamana tara markato tu haröte ii lia lö turu pokus i Sinai.” ⁶ Kaba a toukui te lui e Iesu e pan bala nena a toukui ti kamei u prisira i manasa, taraha nonei te ranga bera noura tere Sunahan, na nonei te hatagalena u hia hanhaniga u tsimus i tarara gono mei e Sunahan, na u hanhaniga teka e niga bala nena u hia hanhaniga na i manasa, taraha u hia hanhaniga teka e la gono menama a manka man niga na man mana.

⁷ Sanena u hia hanhaniga tutuun te nigan töa be Sunahan tema antunan kato lelenei tu hia hanhaniga tu tsimus. ⁸ Kaba e Sunahan noahas te sabe tima niga uai u katuun i tanen, ba nonei e poeiena: “A pöata e la nama romana

balia te kitse gou u hanhaniga u tsimus
gono mer u katuun hobotora
i Israel na i Juda.

⁹ U hia hanhaniga teka ema markato uanoi turu
hanhaniga
ti kato gono merai lia u tuburen
tara pöata tu pile ramen lia i limaren
me luba ragu meien a han i Itsip.

Kaba nori ima kukutie ii u raranga turu han-
haniga i tar
balia a Tsunono ema haniga ra gien.”

¹⁰ Ba Tsunono e mar ranga mera neien teka,
“Nonei u hia hanhaniga u tsimus
te kato gono megoi lia u katunura i Israel.

Alia e hakei goua a lo i tar turu hakhakats i taren
na i tori ren,
ba nori te hakats kap nitöa narouen bate
kukutie ren.

Ba lia te tsunono ragouen
ba nori te hun katuun uariou i tar.

¹¹ U katuun u tetenei na u katuun u kapan has ema
antunan hatuts lel raroui u toularen
bate poeier, ‘Atei sileiam a Tsunono,’
taraha, nori hoboto ena atei sile riou lia,
u katuun u tetenei na u katuun u kapan has.

¹² Ba lia te taatagi ragouen bate luba nagou a man
markato a man omi i taren.
Ba lia tema antunan hakats sil lel na goi a man
markato a man omi ti katoeien.”

¹³ Pöata te ranga naia e Sunahan u hia han-
haniga u tsimus tega katoeien romana, ba nonei
e ranga nena u hia hanhaniga te kato mameien e
toutonei hakapa. Na ka te toutouneina ema ka

lel menei ta nitagala, na ema pina noi ba nonei te taia nou.

9

U lotuna i puta na u lotuna i Kolö

¹ U hia hanhaniga te kato mami e Sunahan e ka mei a man lo turu lotu, na e ka has mei a luman lotu ti kui u katuun. ² Nori i hatakei a luman lotu labalaba te ka mei a huol a makum. A makum tutuun i pal biou i ngöei a Makum a Göagono te kaia a makumun gum turu lam na u tebol na beret ti hala menai tere Sunahan. ³ Na e ka has mei u huol u labalaba te kute has, na i murina u hahuoluna u labalaba e ka mei a tana makum ti ngöei a Makum a Göagono Koru. ⁴ Iahana makum teka e kaia a tsi makumun haats ti kuie ii a goul na ti haatseia u insens, na te ka hasia a bokis turu hia hanhaniga ti kits me kopo kap hoboto nari a goul. Iahana a bokis e kaia a tabeli goul te ka mei a kannouna i manasa ti ngöei u Mana, na u tukana tere Eron te alanga pouts, na huol a hatu ti koloto naia u hia hanhaniga ti kitsi. ⁵ Na iasa tara bokis e kaia a huol a ka ti ngöei a tserubim ti haharuein u ualesala tere Sunahan, na pakapakaren e tapalata bate hohena a makum te luba nai e Sunahan man markato a man omi, me ngöe rien a makum tara nihitaguhu. Kaba alam ema ngilin ranga bala nami a manka teka.

⁶ Na pöata te matskö hakapaia a manka hoboto teka, ba u pris e tasu birbirits tuun ria iahana makum tutuun i pal biou tina kato menaien a toukui i taren. ⁷ Na tsunono pan turu pris puku lasi a töa te tasuia iahana a Makum a Göagono Koru, nonei e ron tasu a töa puku a pöata tara man

tötöa man hiningal. Nonei e roron lui u rahatsing bate töan tasu menen ba tena hala sile neien a peisanen na u katuun has ti kato homi kaba ima atei sile ii ti kato homi uaien. ⁸ U Namnamei u Göagono e hatalesala ra neira a maroro tegi la uu ra tara makum a göagono ema butu halesala noa ii. E markato uana teka, a makum tutuun e haharuei nena a markato na tara Lo na i manasa te antunana i romana. Na Makum a Göagono Koru e haharuei nena a makum te kana e Sunahan ema kalata noa nei tara pöata te ka noa ria u katuun tara luman lotu ti katoe ii u labalaba tuun. ⁹ Tara makum tutuun teka u pris i roron hala menai a man kaan haats ti halhala pukuni tere Sunahan, kaba nori ima antunan kato hagogose ii a torir u katuun ti la uu turu lotu. ¹⁰ Nori i ka las mei a markatona tara kannou na tou ua na mamana mar nigalus. Nori i ranga lasiin a man kana turu tuenrei e antunana tego hamatskö menai e Sunahan a mamana a tsimus.

¹¹ Kaba e Kristo e butu hakapa, na nonei a pris a tsunono pan tara mamana a nigana i romana. Nonei e tasu hakapaia tara luman lotu panina i Kolö. U katuun tima kuieien na ema luman lotu uanei tara han i puta. ¹² E Kristo e tasuia iahana makum hamatskö te kana e Sunahan a töa puku a pöata, bate antunana tara mamana pöata hoboto. Nonei ema tasu mei u rahatsingina meme tsi a tunan bulmakau. E möa. Nonei e tasu mei u rahatsing peisa i tanen bate sakahis pouts nitöa mera nei ra tere Sunahan. ¹³ Tara markato turu Jiu, u rahatsingina meme na bulmakau a tson na u kumahoana tara tunan bulmakau e tsibil naria turu katuun tegi gamon kato hagogoso meraien ba nori te tatei lotur. ¹⁴ Kaba u rahatsing

tere Kristo e tagala koruna. Tara nitagala turu Namnamei te ka nitöana, e Kristo e hala menai a peisanen tere Sunahan na nonei e möa ta töa taka ta omi tega kaia i tanen. U rahatsing i tanen e galus ban u hakhakats u omi, te ka uana tara tou mate, bara te tatei kui beiera e Sunahan te ka nitöana.

¹⁵ E Kristo te habutu u rangen kits u tsimus tere Sunahan na u katuun, ba u katuun te ngöri e Sunahan te tatei lueier a manka a man niga te ranga hamanein e Sunahan bate ka nitöar. Taraha, e Kristo te mate, na tou mate i tanen te sakahis ba rai u katuun a man markato a man omi ti katoeien tara pöata turu rangen kits mam.

¹⁶⁻¹⁷ Tara pöata te hopö kap nena a katuun u raranga i tanen te poeiena esi tena lue nou a manka i tanen i murina tego mate uaien, u ranga teka ema tagala nei tara pöata te töatöa noa nen. Kaba i murina a tou mate i tanen, u raranga e butu hatagala koru nou. ¹⁸ Te marka has uaien i manasa, taraha u rangen kits ti kato mami e tagala las mei u rahatsingina ka ti kato hamateien. ¹⁹ E Mosis e hatei mam rai u katuun a man raranga hoboto te kana tara Lo. Ba nonei te töan lueiena u rahatsing tara tunan bulmakau na meme, me sohala gono meneien u ramun, me hakeie nen turu hulu u rörö tara sipsip na tara kalan ruei ti ngöei u hisop, me tsibil nanen turu bukuna tara Lo na turu katuun hoboto. ²⁰ Ba nonei e poeiena, “Nonei u rahatsing teka te kato hatagalena u raranga te kits gono merai limiou e Sunahan.” ²¹ E Mosis e markato noahas uu iesana me tsibil nena u rahatsing tara luman lotu labalaba, me tsibil has nanen tara manka hoboto turu lotu. ²² Tara markato tara Lo, a mamanaka a parpara e kato hagogoseri u

rahatsing. Na e Sunahan e luba las menei a man markato a man omi u rahatsing tara ka te ngats hamateier.

E Kristo e halan a peisanen tego luba menaien a man markato a man omi

²³ A mamana a man kana turu lotu teka te kato hagogoseier bate haharuei tuun nena a manka a man mana na i Kolö. Kaba a manka ni Kolö egi kato hagogose ii u rahatsing tere Kristo te niga balana.

²⁴ Taraha, e Kristo ema tasu ii tara luman lotu ti kui u katuun bate haharuei tuun nena a luman lotu hamana. E möa. Nonei e tasuia i Kolö, ba nonei e kana i matana e Sunahan me ranga bera noura. ²⁵ A pris a tsunono pan turu Jiu e tasuna tara Makum a Göagono Koru turu mamana u hiningal bate la mena u rahatsing turu enimol. Kaba e Kristo ema tasu haparai bate roron hala nena a peisanen. E möa. ²⁶ Tega markato uaien teka, ba nonei te tatei sagoho hapare iena u kamits, i manasa te habuteia e Sunahan a mamananaka bate antunana i romana. Kaba e möa. E Kristo e butuma tara töa puku a pöata, te sukesukun kapana a man pöata hoboto, tego hala menai a peisanen tara tou mate bate luba nena a man markato a man omi. Na nonei ema antunan kato lel nanei a ka teka.

²⁷ U katuun hoboto e ka meier a man tötä man pöata tena mate merouen, ba i murinen be Sunahan tena ona ranouen. ²⁸ Na e markato has uana iesana, e Kristo e halan a peisanen tara töa puku a pöata tega luba menaien a man markato a man omi turu katuun u para. Na nonei emi butu hahuol nou romana. Nonei ema la hahuol

sile namei romana tegomi luba lel menaien a man markato a man omi. E möa. Nonei e la sile nama romana tegomi taguhu meraien u katuun te hahalose ren.

10

¹ A Lo turu Jiu e haharuei nena a manka man niga tega lama, kaba ema halesala ranera. Nonei ema haröto ranei ra a mouna a manka teka. Na Lo ema antunan kato haniga nitöa ranei ra. Na man haats te hala ner turu mamana u hiningal, ema antunan kato haniga nitöa ranei u katuun te la hasukusukur bate hatsunoner e Sunahan. E möa. ² Sanena u katuun te hatsunoner e Sunahan ti hagalus ba hakapein a man markato a man omi i taren, nori sane ma tatei hakats lel nari a man markato a man omi i taren, na u haats e tatei kapa hasina. ³ Kaba e möa. A markato turu haats e kato rena u katuun bate hakats pouts ner a man markato a man omi i taren turu mamana u hiningal. ⁴ Taraha, u rahatsing tara bulmakau a tson na meme ema antuna koru nei tega luba menaien a man markato a man omi.

⁵ Pöata te katsin lama e Kristo tara han i puta, ba nonei e poeiena tere Sunahan,

Alö ema ngil lenemi tegi haats uaien i tamölö. E möa.

Alö i hale ii lia u tuenrei, ba lia te tatei katoe gou a mamana hoboto tu hopö kap bei lö alia ego katoeien.

⁶ Alö ma sasaala memi te haats mena rien a sipsip na bulmakau a ohots tara makumun haats bate hala mena rien i tamölö.

Na lö ma sasaala has memi te haats uaren i tamölö tego luba menai lö a man markato a man omi.

⁷ Na lia e mar ranga uagu teka, O Sunahan, alia i la sile ma tegomi kato menai lia u ngil i tamölö, ti mar koloto has menaien turu bukuna tara Lo.

⁸ E Kristo e mar ranga mam ua lala teka, “Alö ma ngil lenemi tegi haats uaien i tamölö. Na lö ema sasaala memi te haats mena rien a sipsip na bulmakau a ohots tara makumun haats bate hala mena rien i tamölö. Na manka te haats mena rien i tamölö, bate haats siler tego luba menai lö a man markato a man omi, alö ma sasaala has memien.” Nonei e mar ranga uu teka, noahasina te matskö uana a man haats hoboto teka turu raranga tara Lo. ⁹ Be Kristo e pei lelena, “Alia u la silema tegomi kato menai lia u ngil i tamölö.” Be Sunahan e hakapeiena a markato a toutounei turu haats be palise neien a markato tere Kristo, te kato menaien u ngil tere Sunahan. ¹⁰ E Iesu Kristo e halan a peisanen a töa koru a pöata tara mamana pöata.* Nonei e kato raira u katuun u matskö tere Sunahan, taraha nonei e katoi a ka te ngili e Sunahan.

¹¹ A man pris hoboto turu Jiu e roron tuolur bate katoeier a toukui i taren turu mamana u lan bate hala hapara ner u töa u mar haats. Kaba u haats teka e möa koru tego antunan luba menaien a man markato a man omi. ¹² Kaba e Kristo e halan u töa koru u haats tara man markato a man omi, ba nonei ena gumna tara pal matou tere Sunahan. ¹³ Nonei e hahalosena a pöata tena hala nenama

* **10:10:** E Iesu ema antunan kato lele noi a ka teka.

romana e Sunahan u pakö hoboto i tanen be Kristo tena pitaputa ranouen. ¹⁴ Turu töa puku u haats, nonei e kato haniga nitöar u katuun te kato raien u katuun u matskö tere Sunahan tara markato i taren i puta.

¹⁵⁻¹⁶ Na u Namnamei u Göagono e ranga hamana has uu teka:

“Nonei u rarangan hia hanhaniga u tsimus teka te kitse gou lia turu katunura i Israel tara pöata te la nama romana: alia e hakei goua a lo i tar i toriren, na turu hakhakats i taren ba nori te hakats sil nitöa narouen bate kukutie ren.” Nonei temar ranga uu a Tsunono.

¹⁷ Ba nonei e mar ranga lel uana teka, “Alia ema hakats sil lele goi a man markato a man omi i taren.”

¹⁸ Na pöata te luba nanoua e Sunahan a man markato a man omi i tarara, gara ema antunan haats sil lele ri a man markato a man omi i tarara.

Aragi la hasukusuku uu tere Sunahan

¹⁹ Na matsi hahatoulana, ara e tatei tasu ria iahana Makum a Göagono Koru. Taraha, u rahatsing tere Iesu e hatagala ra noura bara tema tatei matouterei a Makum a Göagono. ²⁰ Tara tou mate i tanen nonei e kalati a maroro a tsimus tegi singo uu ra tere Sunahan. Nonei a marorona tara nitöatöa te silanama turu tuenrei i tanen. Na tara pöata te mateia e Iesu, u labalaba te kute kapiin a tamana iahana Luman Lotu Pan e takiis kata. Na ra e antunan tasu tala ria iahana Makum a Göagono Koru te kana e Sunahan. ²¹ Na ra e ka tala mera a pris a tsunono pan te tara kap

nena a luman lotu hamana tere Sunahan. ²² Aragi la hasukusuku tala uu tere Sunahan. Na ragi hakats hamanaia i torirara bate hamana hatagalara. Na torirara ega gogoso bate moana ta man markato ta man omi tegi hasagohi ra, na tuenreirara i galuseia turu ramun u gogoso koru. ²³ Aragi pile hakarapotein a ka a niga te hamana sile rara bate hatei rari u katuun, taraha ara e atei silera e Sunahan e kato hamane nou romana u raranga u mana i tanen. ²⁴ Aragi hakats sil hasir a man hahatoulana i tarara, bate taguhu raren tegi hatara menaien u ngilngil i taren bate katoeier a man toukui a man niga. ²⁵ Ara gima hanöan hagum ii, te markato uaier a palair u katuun. E möa. Aragi kato hatagala kap nitöari a man hahatoulana, taraha u Lan Pan tara Tsunono e sukusuku hakapama.

²⁶ Na ti atei sil hakape iara u raranga u mana bara te kato homi noahasira, ge möa lel tala tu haats tega luban a man markato a man omi i tarara. ²⁷ Aragi matout lasi u Kout tere Sunahan na u tula te ats hahiski nitöana tena ats ria romana u katuun te omier e Sunahan. ²⁸ Alimiou e atei silemiou a markato turu Jiu: te hipus naia a töa katuun a Lo tere Mosis ba huol tsi a topisa katuun te hatangana hoboto naren te kato homi uaieren, ga nori ema antunan taatagi naroiere. E möa. Nori e atung hamatie ren. ²⁹ Kaba a nihahuna te pan bala koruna e hahalosena a katuun te omiena a Pien Tson tere Sunahan. Taraha, nonei e sigalena u rahatsingina turu ranga te kitsi e Sunahan. Nonei u rahatsing te kato mam meieren a katuun a matskö tere Sunahan. Na nonei e ranga homi has nena u Namnamei tere Sunahan te taatagi nen. ³⁰ Ara e

atei silera e Sunahan e mar ranga uu teka, “Alia tena hipou gou romana. Na lia noahas tena palise gouen romana.” Na nonei e pei hasi, “A Tsunono noahas tena ona ranou u katuun i tanen.” ³¹ A ka a omi koru e butu noua tara katuun tena hahune nou e Sunahan te töatöa nitöana.

³² Alimiou go hakats pouts naiam a pöata i manasa. I murina tu butu tutuun mia limiou turu ualesala tere Sunahan, alimiou u lueiam a kamits na niomi a parpara, kaba limiou uma hapolasa mi. E möa. ³³ Palaina pöata u katuun i ranga hohomi raiou limiou bate kato homi raria limiou i matar u katuun, na palaina pöata nori i markato has uu teka tara man hahikapien i tamilimiu.

³⁴ Alimiou u taatagi sil raiam u katuun ti haka raia tara karabus. Na pöata ti lueia u katuun a manka i tamilimiu, alimiou u sasaala noahas iam, taraha alimiou i atei sileiam e ka mena a manka man niga koru e kana. ³⁵ Alimiou goma hapolase mi u nihamana u tagala i tamilimiu, be Sunahan te hala ranei romana limiou u hamatana u niga. ³⁶ Alimiou go hamana hatagala koruam bate kukute miou u ngil tere Sunahan ba limiou te lue miou a ka a niga te ranga hamana naien.

³⁷ Taraha, u Buku u Göagono e poeiena:

“Ema pina noi ba katuun tego lama tena la nama romana.

Nonei ema hamokomoko namei romana.

³⁸ U katuun i tar te kato hamatskör e töatöa sila roua te hamana uaren.

Kaba te hakopis pouts noua ta töa i taren, balia te raharahe gouen.”

³⁹ Kaba ra ema antunan hakopis pouts rei batena taiara. E möa. Ara u katuun te hamana uara tere Sunahan, nonei e taguhu koru ranou ra.

11

U nihamana

¹ A markato turu nihamana e markato uana teka: ara e atei silera a manka te hamana sile rara e butu hamana nou. Na ra e atei silera a manka tema tare rei ra e mana noahasina. ² U katunur i manasa i hamanaia tere Sunahan, na nonei a ka te haniga sila raien e Sunahan.

³ Turu nihamana i tarara bara te atei silera e Sunahan e habuteia a mamananaka turu ranga i tanen. Na sahaka te tare rara, e butuma tara ka tima tarei ra.

⁴ Turu nihamana tere Ebol, be Sunahan e hanigeiena u haats i tanen batema hanigenei u haats tere Kein. E Sunahan e haniga korui e Ebol me ngöe neien a katuun a matskö, na turu nihamana i tanen be Sunahan e luena manka te hala naien. E Ebol e mate, kaba turu nihamana i tanen nonei e ranga noahasina.

⁵ Turu nihamana tere Inok be Sunahan e lu sei ba naneien a tou mate i tanen. U katuun ima antunan sabe naien, taraha e Sunahan e lu sei hakapeien. Na u Buku u Göagono e poeiena e Inok e kato hasasaali e Sunahan i mam be Sunahan e lu seienen. ⁶ Te möa rara tu nihamana tere Sunahan, nonei ema antunan sasaala mera neira. Taraha, esi te ngilin la uanama tere Sunahan ega hamani e Sunahan e kana, bate hala nena a manka man niga turu katuun te sakie ren.

⁷ Te hamana menai e Noa e Sunahan te ranga menaien a pöata a omi tega lama tema tara noei e Noa, e Noa e hengöe e Sunahan me kuiena a tolaala, te niga sila gono meraien a galapien i tanen. Ba nonei e haröto nena te hahuna merai e Sunahan u katuun i puta ti hahamana uaien,

be Sunahan e ngöe neien a katuun a matskö te hamana uaien.

⁸ Te hamana menai e Abraham e Sunahan me hengoena te ngö menaien tega la uaien tara han tena hala nanouen, temar ranga uu e Sunahan. Be Abraham e laba nena han i tanen, kaba nonei ema atei sile ii ime tega la uaien. ⁹ Turu nihamana i tanen tere Sunahan ba nonei ena kana tara tana han te ranga meien e Sunahan. Nonei e kaia tara luma labalaba me ka here nei a katununa tara tana han te keien a tsitabubun pöata tuun. Na pien i tanen e Aisak na u hatutubunei i tanen e Jekop, nori i lu gono has meien u töa u raranga hamana tere Sunahan. ¹⁰ Taraha, e Abraham e hahalosi a han te gum hatagala koru te kui e Sunahan.

¹¹ Turu nihamana noahas tere Sara tere Sunahan, be Sunahan e hale neien a nitagala tega pika uaien, noahasina te toböana koru uaien. Kaba e Sara e hamana noahasi e Sunahan ega kato beien a ka te ranga mam noa naien. ¹² Ba tara töa tson puku teka, a tson a tsonpan koru bate katsin matena, nonei a tson teka te kamei u hatutubunei u parpara koru te herei a man pitopitora i kolö na u kotolana tema antunan ase sabe nari.

¹³ U katuun hoboto teka i mate hakapa, kaba nori i hamana noahasi e Sunahan. Nori ima lue ii a manka te ranga meraien e Sunahan, kaba nori i taran lehana tuun naien me hanige ren. Ba nori e hatei ner nori u katunun hulala tuun i puta tara tsitabubun pöata. ¹⁴ U katuun temar ranga uaier teka e haröto ner nori e sakier ta han tegi tue hamatsköeien. ¹⁵ Nori sanena ti hakats poutsin a han ti laba namen, ba nori te tatei sake poutser ta maroro tegi mar kopis pouts uaien. ¹⁶ Kaba e

möa. A han ti ngil bala korueien te niga bala, nonei a han i Kolö. Na e Sunahan ema matsingolo mei tegi ngö menaien a Sunahan i taren, taraha nonei e kato beraien a han.

¹⁷⁻¹⁸ E Sunahan e ranga hamanaia tere Abraham i manasa me poeiena, “Alö e ka sila memia romana u hatutubunei u parpara koru tara pien i tamölö e Aisak.” E Abraham e hamani e Sunahan, ba pöata te torohane ien e Sunahan be Abraham e katoenei a pien i tanen e Aisak a kaan haats tara makumun haats. E Abraham e hengo nohasi e Sunahan me hakena a töa koru a pien tson i tanen tara makumun haats. ¹⁹ Taraha, e Abraham e atei sil e Sunahan e antunan hatakei poutsin e Aisak tega mate uaien. Bate here talei e Abraham e lu poutseia a pien tson i tanen tara tou mate.

²⁰ E Aisak e hamana uu tere Sunahan, me kalala rena galapien i tanen me ranga hamana nena a manka man niga tegi lui romana ere Jekop mere Iso.

²¹ Na turu nihamana noahas be Jekop e kalala rena man tötöa man pien tere Josep tara pöata te susukun mateien. Nonei e ranga hamanein a manka man niga tegi lui a galapien tson tere Josep. Nonei e tötörököia i bakuna u tukana i tanen me hatsunono uana tere Sunahan.

²² Turu nihamana noahas tere Josep, ba tara pöata te katsin mateien, ba nonei e hatei rena u katunura i Israel egi laban romana a han i Itsip, me ranga merena u katuun i tanen ime tegina mar kaho menaien romana tego mate uaien.

²³ Turu nihamana noahas be tamana e Mosis na e tsinana e Mosis e hamouse ren tara topisa tsihou i murina ti poseien. Nori i tarei nonei a pien a niga

koru, ba nori ema matouteri tegi hipus menaien u raranga pan tara king te pei menaien, “A man galapien tson a man göama tara tei Israel egi kato hamatir.”

²⁴ Turu nihamana noahas tere Mosis, ba pöata te pan hakapaien, ba nonei e rama nena tegi ngö menaien a pien tson tara pien tahol tere Pero a King. ²⁵ E Mosis ema ngile ii a nisasaalana tara markato a omi ba nonei e ka gono meranen a tsitabubun pöata puku. E möa. Nonei e ngilin ka gono mer u katuun tere Sunahan, bate lu gono meraneien u nikamits. ²⁶ Nonei e mar hakats uu teka, e niga bala nena tegi hamana uu tara katuun tena la nama romana nonei e Mesaia, e noahasina ti ranga homi uu katuun i tanen. Kaba markato teka e niga balein a manka man niga hobotona i Itsip. Taraha, nonei e hahalosi u hamatana u niga tega haleien e Sunahan.

²⁷ Turu nihamana noahas tere Mosis ba nonei laba nena i Itsip. Nonei ema matoute ii te raharaha uu a king. A katuun ema antunan tare nei e Sunahan, kaba e Mosis e herei e tareien bate tagala silena a ka te ngilin katoeien. ²⁸ Na u nihamana noahas tere Mosis te kato meien u Paska tutuun turu Jiu ba nonei e katoena u raranga tegi ngats hamate merai u sipsip bate tsibil naria u rahatsingina sipsip tara man tamana, ba Angelona tara Tou Mate tema tatei atung hamate ranei a man galapien tson a man hamua turu katunura i Israel.

²⁹ Na turu nihamana noahas turu katunura i Israel, me aroho sila ria i gusuna a Tasi a Rörö me tataala ria turu tsiktsiki te kato harakaraki e

Sunahan, me la sokör i hapala. Ba u katunur i Itsip e katsin kukute rarimen ba nori e ruku hakapar.

³⁰⁻³¹ E Rehap a töa tahol a lulu tson e kaia i Jeriko. Kaba turu nihamana i tanen tere Sunahan ba nonei e nigana. Na pöata ti lama a man tsonun taratara kopkop turu soldia ri Israel, ba nonei e taguhu ranen. Turu nihamana turu katunura i Israel tere Sunahan memi la hahis hoboter a taun i Jeriko turu tohit u lan, ba ololo tara taun e talupuna me rusuna. Na nori i kato hamatir u katuun tima ngilin kukute ii e Sunahan, kaba nori ima kato hamate ii e Rehap.

³² Na lia e antunan mar hala noahas menagi u raranga i tar teka, kaba e möa ta pöata i tar tego hatei merai lia ere Gidion mere Barak ne Samson ne Jepta, na e Devit mere Samuel na u propet.

³³ Nori i hamanaia tere Sunahan me tagala saluhe ria tara man makumun han tara man king a man parpara. Nori i kato hatagala korui a man markato a man matskö me lueier a ka te ranga hamanein e Sunahan. Na palai ti kaia tara man makum ti ka hasia u laion, u laion ima kato homi raian. ³⁴ Na palai ti lapo raia turu tula u ats koru ima omi has ii. Na pala ti hamanaia tere Sunahan ima ngats hamate has rai. Nori ima tagala ii, kaba nori ina tagala koru tsiponi. Nori i tagala koruia tara hiatatung, na i tagala saluher a man amir tara man palair u han. ³⁵ A touhaliou ti hamanaia tere Sunahan i lu poutsir u katuun i taren te hatakei pouts raia e Sunahan tara tou mate.

Na palair u katuun i kato hakamits koruri me hasoso noa lasir, taraha i murina a tou mate i taren ba nori tena takei sile riou a nitöatöa a niga

koru. ³⁶ Ba palair u katuun i golgol silir me lahus raier, ba palai e kits rari a tsien me haka raria tara karabus. ³⁷ A palai i ti hamate tuun rai a hatu, na palai i so kots tunir, na palai i ngats hamate rai u lahoton hiatatung. Na palai i hapous tuun rai a pikpiköna a sipsip na meme. Nori i möa koru ta ka, na u katuun i kato hohomi koru raien. ³⁸ Nori i hula laia tara makum a palaka na tara pokus, na nori i sösohoia tara man kiou. U katuun u omi tara han i puta ima antuna ii turu katuun u niga ti kaia i gasuren.

³⁹ U katuun u niga hoboto teka i hamanaia tere Sunahan na e Sunahan e haniga koru raien. Kaba nori ima lu noei a ka te ranga hamana meraien e Sunahan tegi hala raien. ⁴⁰ Taraha, e Sunahan e atei sil mami a ka te niga bala tega butuia tara pöata i tarara, na nonei e ngil tegi lu hoboto gono meraien ra a ka a niga teka.

12

E Sunahan e Tamarara

¹ Aragi hakats silir u katuun u parpara te ka hahis rarioura ti harötein u nihamana. Na ragi luban a mamanaka hoboto te kato halolomoto ranoura, tegi piata ura turu resis te hopö kap beraira e Sunahan. Aragi luban a man markato a man omi te pile kap ranoura, bara te kukute hatagalera a maroro te haröto raira e Sunahan.

² Aragi tara las uu tere Iesu. Nonei a mouna u nihamana i tarara na nonei te kato hamanena a manka te hamana sile rara. Nori i nila naien tara kuruse, na nonei ema rama ii. Nonei ema matsingolo rai u katuun tega mate here menaien a

katuun a kopkop, taraha nonei e atei sil nonei ena sasaala koru nou. Na i romana nonei e gumna tara pal matou tere Sunahan noahas.

³ Alimiou go hakats haniga naiam e Iesu. Nonei e tagala sil korui e Sunahan, e noahasina ti kato hohomi koru menaien u katuun u omi, ba limiou tema tatei sōkana moi bate tor tsuga miou.

⁴ E manana, alimiou e hiata tung gono memiou a markato a omi, kaba alimiou uma hiata tung hatagala koru noami bate antunana tego mate uaiam limiou. ⁵ Alimiou a galapien tere Sunahan u solopala hakapeiam a man raranga a man niga te ranga gono merai limiou e Sunahan? Ba nonei e poeiena,

“A pien i tar, möa tu tara papali te hahuna menanei lö a Tsunono.

Na pöata te hahune nen lö, möa tu tori tiama.

⁶ Taraha, a Tsunono e hahuna rena u katuun hoboto te ngil koru ranen.

Na, nonei e singata has rena u katuun hoboto te ngö raneien a galapien i tanen te kato homi rien.”

⁷ Alimiou go lueiam a kamits tu mar lu mena milimiou u nihahuna turu tamamilimiou. Taraha, pöata te kamits mia limiou, e haröto nena e Sunahan e kato here ranei limiou a galapien i tanen. Na e möa ta pien tegama hahunei e tamanen. ⁸ Na tema lue mia limiou a nihahuna temar lu uaier a palair a galapien tere Sunahan, alimiou ema pien uami i tanen. E möa. Alimiou e here rami a galapien u pikeilatu. ⁹ Ara hoboto e kameiera u tamarara i puta ti hahuna raiou ra, ba ra te hapan raren. Kaba aragi hala puta

korui a peisarara tere Tamarara i Kolö bate luera a nitöatöa hamana. ¹⁰ U tamarara i puta i hahuna merai ra a tsitabubun pöata temar niga uaien turu hakhakats i taren. Kaba e Sunahan e hahuna sil ranei ra ega taguhu raiou ra bara temar niga has uara, te markato has uanen. ¹¹ Pöata te hahuna rariara, ara e kamitsira batema ka haniga rei. Kaba i murina u nikamits ara e ka haniga rou ba torirara te sasaala nitöa nou.

U rangan hihatuts

¹² Alimiou go söata seiam a lima milimiou te omina. Bate hatagalemiou a tukuluna mou milimiou tema tagala nei. ¹³ Taguhu raiam a palai bate sila ria tara maroro a matskö, bate tagala miou ba limiou te ka haniga miou.

¹⁴ Alimiou go torohana hatagala sileiam tego ka haniga gono mera milimiou u katuun hoboto. Taraha, a katuun tema göagono nei ema antunan tara nanei a Tsunono. ¹⁵ Tara kap haniga raiam a palai bate moa nou ta töa tega habirits ban a nihitaguhi tere Sunahan. Ta töa ena mots tori homina i gusumilimiou bate hatakeiena ta raharaha bate kato homiena u hakats tara palai. ¹⁶ Alimiou go tara kap hanigaiam, batema tsikolo mi. Na limiou goma sigalemi e Sunahan te markato uu e Iso. Nonei a pien tson a hamua te ka mei a nikapan, kaba nonei e halan a nikapan i tanen tere toulanen a tetenei me hol tune neien a tsi kannou tuun. ¹⁷ Alimiou e atei silemiou, i murina te markato uaien teka ba nonei e ngilin lu pouts nena a nikapan i tanen na mamanaka a niga tere tamanen, kaba nonei ema antuna ii. E Iso e tabe

koru sileien, kaba e möa lel ta maroro tega palis pouts menaien a ka te katoeien.

¹⁸ Alimiou uma la uami turu pokus, ti markato uu katunura i Israel ti la uaien turu Pokus i Sinai. Te kamei u pannen u tula u kulupu na u kuhil na pannen a lomolomo. ¹⁹ U katuun i hengo a ka te ling herei a tuhil na u raranga te katoi a katuun banori e matout korur mema ngilin hengo lel nari u ranga teka. ²⁰ Nori i matout korui u raranga tere Sunahan te pei, “Te sebele noua ta katuun tsi ta töa ta ka u pokus, e ti hamate raroui ta hatu.” ²¹ Na e Mosis has e matout koru hasi a manka te tareien me poeiena, “Alia e toltololo koru has megu a nimatout.”

²² Kaba limiou uma la uamei tara han te markato uana teka. E möa. Alimiou u la uamuma turu Pokus i Saion, te ngöeri a han tere Sunahan te töatöana, na te ngö haseri a Jerusalem a Tsimus te kana i Kolö. Alimiou u la uamuma turu angelo u parpara koru te ka hobotor bate sasaala nitöar. ²³ Alimiou u la uamuma turu hagum turu katuun te here hoboto ri a pien a hamua tere Sunahan, a soloren ti koloto raia i Kolö. Alimiou u la uamuma tere Sunahan, nonei te ona rena u katuun hoboto, na u namnamei turu katuun u matskö te kato haniga pouts raien. ²⁴ Alimiou u la uamuma tere Iesu, nonei te kits gono meraira na e Sunahan u rangan haniga u tsimus. Alimiou u la uamuma turu rahatsing i tanen te tatsihasa sil raioura me hala nena a nihitaguhu, te niga bala nena a ka te rangein u rahatsing tere Ebol.

²⁵ Na limiou go haneiam. Alimiou goma raman hengo nami e Sunahan te ranga uanen i tamilim-iou. U katuun tima ngilin hengo ii tara pöata te

ranga ien i puta, nori ima antunan bus hamous banari a nihahuna i tanen. Na ra ema antunan bus hamous ba narien romana tega ranga uamen i tarara te kanen i Kolö. ²⁶ Pöata te rangaia e Sunahan i manasa, ba u tsiktsiki e tagasina. Kaba i romana nonei e ranga hamana koru lel talana bate poeiena, “Alia e gas töa lele gou u tsiktsiki na u kolö has.” ²⁷ U raranga teka e haröto nena e Sunahan e gasena romana a manka te katoeien bate luba ranen ba manka tema antunan tagas nei te kana romana.

²⁸ Na ragi haniga uu tere Sunahan te ka uaria ra tara nipepeito i tanen tema antunan gas nari. Aragi hatsunoneien na ragi singo uu i tanen, bate hapane ren na aragi matout haseien. ²⁹ Taraha, e Sunahan i tarara e here nei u pan nen u tula te ats koruna.

13

Aragi kato hasasaali e Sunahan

¹ Ngil raiam a man hahatoulana i tamilimiou te hamana uami limiou tere Kristo. ² Na limiou go ngö has merami u katunura i lehana i luma i tamilimiou. A palair u katuun i markato uu teka turu angelo, kaba nori ima atei sil raien. ³ Ma solopala rami u katuun te ka ria tara karabus.* Hakats here rami alimiou e ka gono mera men tara karabus. Hakats sil has raiam u katuun te kato hakamits raiet, kato here has rami u katuun e kato hakamits has rariou limiou.

* **13:3:** A katuun te koloti u buku teka e hakats toumin a palair u katuun ti lu merai tara karabus ti hamana uen tere Kristo.

⁴ Alimiou hoboto ego hagöagoneiam a markatona tara hitöl bate hiahhammana namiou a peisa milimiou. A tson na tahol egima sake lel lanai ta taina ta tahol tsi ta taina ta tson gi soho gono meien. Taraha e Sunahan e hahunei nou a tson na tahol temar kato uaier teka.

⁵ E möa tu ngil korueiam a moni, ba limiou te sasaala memiou a manka te ka memi limiou. Taraha, e Sunahan e pei,
 “Alia ema antunan laba ragi limiou
 tsi ema antunan solopala ragi limiou.”

⁶ Ba ra te tatei ongolora bate poeiera,
 “A Tsunono e taguhe noulia. Alia ema antunan
 matoutegi ta ka
 tegi kateia u katuun tuun i tar.”

⁷ Hakats sil raiam u tsunono i tamilimiou, nori ti hatei mam railimiou u raranga tere Sunahan. Hakats kap naiam a manka man niga te butuma tara markato a niga i taren, ba limiou te hamana mia tere Sunahan timar hamana has uaien. ⁸ E Iesu Kristo, nonei puku noahasina i manasa, na i romana na tara mamana pöata. Nonei ema tatei palis nei. ⁹ U hihatuts tema atei sileri te las ba ranoui limiou a maroro tere Sunahan egima kukute ii. A torimilimiou ema antunan lu nanei ta nitagala tara mamana mar lo na tara kannou. A man lo teka ema taguhu ranei u katuun te kukutie ren. E möa. A tori milimiou ega tagala mei a nihitaguhu tere Sunahan.

¹⁰ Ara u kristen e ka mera a makumun haats, nonei a kuruse tere Kristo. U Jiu te lotu ria tara markatona i manasa ema tatei lotu ria tara makumun haats i tarara teka. ¹¹ Tara Lo turu Jiu, pöata te luena a tsunono pan turu pris u

rahatsing tara bulmakau a tson na meme bate la mena neien iahana Makum a Göagono Koru tego luba menaien a man markato a man omi, a tuenrei ren e haats hakapa raria tara makumun haats ielesala tara han. ¹² Na e Iesu e mate hasia ielesala tara taun tega hamatskö meraien ra tere Sunahan turu rahatsing peisa i tanen. ¹³ Aragi laban a han te ka rara bate la uara tere Iesu ielesala, bara tena söata haseiera a nimatsingolo timar hamatsingolo has menai u katuun e Iesu. ¹⁴ Taraha, ara ema ka meri ta han i puta teka tega ka nitöa romana. E möa. Ara e hahalosera a han tena la nama romana, teka nitöa nou. ¹⁵ Ba tere Kristo aragi haats nitöa uu tere Sunahan te solosei mena reira e Sunahan te ranga uarara i tanen.† ¹⁶ Alimiou goma solopalemi tego kato haniga mera milimiou a palair u katuun bate hiatagtaguhu miou. A markato teka e ngil korue nen na e kato hasasaalena e Sunahan.

¹⁷ Hengo haniga raiam u tsunono i tamilimiou, bate kukute miou u raranga i taren. Taraha, nori e tara kapin toa rariou limiou. Te hengo ramouen limiou, ba nori te sasaala meriou a toukui i taren. Kaba te möa nouen, ba toriren te tiama nou, ba ka teka tema taguhu ranoui limiou.

¹⁸ Singo be ramu moulam tere Sunahan. Taraha, alam e hasagohem a torimulam e gogosona i matana e Sunahan, na lam e ngilin kato hanigantöa nem a mamanaka. ¹⁹ Alia e rangata hatagala silegu tego singo sil mena limiou alia be

† **13:15:** U kristen ema kato leneri u haats i romana, u singona te solosei menarira e Kristo nonei u haats te katoe rara.

Sunahan te hala boroboro pouts mena meilia i tamilimiou.

U singo

²⁰⁻²¹ E Sunahan, te hala ranei ra a masalohana, e tatei hala ranei limiou a mamananaka a niga, antunana tego kato mena milimiou u ngil i tanen. Nonei te hatakei poutsi a Tsunono i tarara e Iesu, nonei a katuun te taratara kap rena u katuun i tanen bate here nei a katuun te taratara kap rena u sipsip i tanen. Nonei e hatakei poutseien tara tou mate me haröto nena u rahatsing i tanen te kato hatagalena u rangan hiahhanhaniga te kits gono meien e Sunahan na u katuun. Nonei u raranga te ka nitöana. Nonei e tatei taguhu ranou limiou ba limiou te katoemiou a manka te niga balana i matanen, te hamana uamia limiou tere Iesu Kristo. Aragi solosei e Kristo tara mamana pöata i murimuri. U mana.

U kapakapana u ranga

²² A matsi hahatoulana, hengo hanigeiam u raranga te koloto negulia teka batema sökanami, taraha u pas teka u makmakum. ²³ Alia e hatei rahi limiou e toularara e Timoti i halakasa hakapeia tara karabus. Te la hasesei namen romana, ba nonei te la gono menou lia tegona tara merai lia limiou.

²⁴ Hala menami u hanhaniga i tamulam tara pal kapan hoboto i tamilimiou na turu katuun hoboto tere Sunahan. A matsi hatoulana hasiri Itali e hala has rari limiou u hanhaniga i taren.

²⁵ A nihitaguhu tere Sunahan e tatei kagono meranou limiou hobotontöa. U mana.

Nonei talasi.

U BULUNGANA U NIGA
The New Testament in the Halia Language of Papua
New Guinea
Nupela Testamen long tokples Halia long Niugini

copyright © 2020 Bible Society of Papua New Guinea and Wycliffe Bible Translators, Inc.

Language: Halia

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-06-08

PDF generated using Haiola and XeLaTeX on 11 Nov 2022 from source files dated 5 May 2022

03815460-d6a0-5a59-aa7b-2a4278f7e67d